



Broj: 03/6-50-14-12-10/21

Na osnovu člana 3. stav (1) Odluke o Vijeću nacionalnih manjina Bosne i Hercegovine ("Službeni glasnik BiH", br. 10/21), Zajednička komisija za ljudska prava Parlamentarne skupštine Bosne i Hercegovine objavljuje

JAVNI P O Z I V
ZA KANDIDIRANJE U ČLANSTVO VIJEĆA NACIONALNIH MANJINA
BOSNE I HERCEGOVINE

I.

Pozivaju se registrirana udruženja nacionalnih manjina ili druge nevladine organizacije koje okupljaju nacionalne manjine u Bosni i Hercegovini da, shodno članu 3. Zakona o zaštiti prava pripadnika nacionalnih manjina („Službeni glasnik BiH“, br. 12/03, 76/05 i 93/08) i člana 3. Odluke o Vijeću nacionalnih manjina Bosne i Hercegovine, dostave prijedloge kandidata za članstvo u Vijeću nacionalnih manjina Bosne i Hercegovine.

Nacionalna manjina je, u skladu s članom 3. Zakona o zaštiti prava pripadnika nacionalnih manjina, dio stanovništva - državljana Bosne i Hercegovine koji ne pripadaju nijednom od tri konstitutivna naroda, a čine je ljudi istog ili sličnog etničkog porijekla, iste ili slične tradicije, običaja, vjerovanja, jezika, kulture i duhovnosti i bliske ili srodne historije i drugih obilježja.

Vijeće nacionalnih manjina Bosne i Hercegovine daje mišljenja, savjete i prijedloge Parlamentarnoj skupštini Bosne i Hercegovine o svim pitanjima koja se tiču prava, položaja i interesa nacionalnih manjina u Bosni i Hercegovini. Vijeće može delegirati stručnjake za rad ustavnopravnih komisija i Zajedničke komisije za ljudska prava kada one raspravljaju o pravima, položaju i interesima nacionalnih manjina.

II.

U skladu s članom 3. Odluke o Vijeću nacionalnih manjina Bosne i Hercegovine, kriteriji za izbor članova Vijeća nacionalnih manjina Bosne i Hercegovine su:

a) opći kriteriji:

1. kandidat mora biti državljanin BiH,
2. kandidat mora biti stariji od 18 godina,
3. kandidat mora biti član aktivnog udruženja nacionalne manjine kojoj pripada,
4. kandidat mora potpisati Izjavu o pripadnosti nacionalnoj manjini za koju se kandidira,

5. kandidat mora dostaviti Izjavu o odricanju od prava na članstvo u drugim vijećima nacionalnih manjina na bilo kojem nivou vlasti u Bosni i Hercegovini u slučaju izbora u Vijeće nacionalnih manjina Bosne i Hercegovine, s obzirom na to da kandidat ne može istovremeno biti član drugog vijeća nacionalnih manjina na bilo kojem nivou vlasti u Bosni i Hercegovini;

b) preporučeni/dodatni kriteriji:

1. kandidat treba poznavati ustavnopravni okvir Bosne i Hercegovine i međunarodne konvencije u domenu zaštite ljudskih prava i prava manjina,
2. kandidat treba imati praktično iskustvo u domenu zaštite ljudskih prava i prava manjina,
3. kandidat treba aktivno učestvovati u projektima i radu udruženja koja se bave pitanjima nacionalnih manjina,
4. kandidat treba uživati podršku aktivnih udruženja nacionalne manjine kojoj pripada. Udruženja koja predlažu kandidata prilažu i godišnji finansijski izvještaj za prethodnu godinu,
5. kandidat treba imati preporuku saveza udruženja nacionalnih manjina ako je udruženje kojem pripada član saveza.

Uz prijedlog za člana Vijeća nacionalnih manjina Bosne i Hercegovine, potrebno je dostaviti rješenje o registraciji udruženja nacionalnih manjina ili druge nevladine organizacije koja okuplja nacionalne manjine u Bosni i Hercegovini, prijavu na Javni poziv za kandidiranje u članstvo Vijeća nacionalnih manjina Bosne i Hercegovine, biografiju kandidata u kojoj će se posebno obrazložiti ispunjavanje preporučenih /dodatnih kriterija, te dokumente kojima se dokazuje ispunjavanje općih kriterija iz ove tačke.

III.

Na osnovu prikupljenih prijava, te uz nastojanje da se ispoštuje odredba člana 20. stav (2) Zakona o ravnopravnosti spolova u Bosni i Hercegovini („Službeni glasnik BiH“, broj 32/10 – prečišćeni tekst), Zajednička komisija za ljudska prava utvrđuje prijedlog članova Vijeća nacionalnih manjina Bosne i Hercegovine, u skladu s članom 3. stav (4) Odluke o Vijeću nacionalnih manjina Bosne i Hercegovine. Parlamentarna skupština BiH, na prijedlog Zajedničke komisije za ljudska prava, imenuje članove Vijeća, u skladu s članom 3. stav (5) Odluke o Vijeću nacionalnih manjina Bosne i Hercegovine.

IV.

Vijeće nacionalnih manjina Bosne i Hercegovine čini po jedan predstavnik nacionalne manjine, u skladu s članom 2. Odluke o Vijeću nacionalnih manjina Bosne i Hercegovine.

Mandat članova Vijeća traje četiri godine od dana konstituiranja Vijeća.

V.

Prijedlog za člana Vijeća nacionalnih manjina Bosne i Hercegovine, uz dokumentaciju kojom se dokazuje ispunjavanje kriterija za izbor članova Vijeća nacionalnih manjina Bosne i Hercegovine iz tačke II. ovog javnog poziva, dostaviti na adresu:

***Parlamentarna skupština Bosne i Hercegovine, Zajednička komisija za ljudska prava -
„Javni poziv za kandidiranje u članstvo Vijeća nacionalnih manjina Bosne i Hercegovine“
s napomenom „Ne otvarati“, Trg BiH 1, 71 000 Sarajevo.***

VI.

Javni poziv otvoren je 30 dana od dana objavljivanja u dnevnim novinama Dnevni avaz, Oslobođenje, Nezavisne novine, Glas Srpske i Večernji list, te na internetskoj stranici Parlamentarne skupštine BiH.

U slučaju da Javni poziv ne bude istovremeno objavljen u dnevnim novinama i na internetskoj stranici Parlamentarne skupštine BiH, početak roka za dostavljanje prijave računat će se od posljednjeg objavljivanja Javnog poziva.

Nepotpune i neblagovremene prijave neće biti razmatrane.

Za sve informacije zainteresirani se mogu obratiti sekretarki Zajedničke komisije za ljudska prava Aidi Kreho na broj telefona: 033/286-028 ili na e-mail: aida.kreho@parlament.ba.

**Predsjedavajući
Zajedničke komisije**

Lazar Prodanović
